

四庫全書薈要

• 乾隆御覽本

史部

欽定四庫全書薈要

史部  
隋書卷一

詳校官內閣侍讀孫球



欽定四庫全書叢要

隋書目錄

唐太尉揚州都督監修國史上柱國趙國公臣長孫無忌等撰

帝紀五

志三十

列傳五十

共八十五卷

帝紀

隋書卷一

帝紀第一

高祖上

隋書卷二

帝紀第二

高祖下

隋書卷三

帝紀第三

煬帝上



隋書卷四

帝紀第四

煬帝下

隋書卷五

帝紀第五

恭帝

志

隋書卷六

志第一

禮儀一

隋書卷七

志第二

禮儀二

隋書卷八

志第三

禮儀三

隋書卷九

志第四

禮儀四

隋書卷十

志第五

禮儀五

隋書卷十一

志第六

禮儀六

隋書卷十二

志第七

禮儀七

隋書卷十三

志第八

音樂上

隋書卷十四

志第九

音樂中

隋書卷十五

志第十

音樂下

隋書卷十六

志第十一

律歷上

隋書卷十七

志第十二

律歷中

隋書卷十八

志第十三

律歷下

隋書卷十九

志第十四

天文上

隋書卷二十

志第十五

天文中

隋書卷二十一

志第十六

天文下

隋書卷二十二

志第十七

五行上

隋書卷二十三

志第十八

五行下

隋書卷二十四

志第十九

食貨



隋書卷二十五

志第二十

刑法

隋書卷二十六

志第二十一

百官上

隋書卷二十七

志第二十二

百官中

隋書卷二十八

志第二十三

百官下

隋書卷二十九

志第二十四

地理上

隋書卷三十

志第二十五

地理中

隋書卷三十一

志第二十六

地理下

隋書卷三十二

志第二十七

經籍一

經

隋書卷三十三

志第二十八

經籍二

史

隋書卷三十四

志第二十九

經籍三

子

隋書卷三十五

志第三十

經籍四集 道經 佛經

列傳

隋書卷三十六

列傳第一

后妃

文獻獨孤皇后

宣華夫人陳氏

容華夫人蔡氏

煬帝蕭皇后

隋書卷三十七

列傳第二

李穆

子渾

穆兄子詢

崇子敏

梁睿

隋書卷三十八

列傳第三

劉昉

鄭譯

柳裘

皇甫績

韋謏

盧賁

隋書卷三十九

列傳第四

于義

子宣道

宣敏

陰壽

子世師

骨儀附

竇榮定

元景山

源雄

豆盧勣

子毓

勣兄通

賀若誼

隋書卷四十

列傳第五

梁士彥

子剛

梁默

宇文忻

王誼

元諧

王世積

虞慶則

元冑

隋書卷四十一

列傳第六

高頴

蘇威子夔

隋書卷四十二

列傳第七



李德林

隋書卷四十三

列傳第八

河間王弘

子慶

楊處綱

楊子崇

觀德王雄

弟達

隋書卷四十四

列傳第九

滕穆王瓚

嗣王綸

道悼王靜

衛昭王爽

嗣王集

蔡王智積

隋書卷四十五

列傳第十

文四子

房陵王勇

子儼

秦孝王俊

子浩

庶人秀

庶人諒

隋書卷四十六

列傳第十一

趙熒

趙芬

楊尚希

長孫平

元暉

韋師

楊昇

蘇孝慈

兄子沙羅

李雄

張熒

劉仁恩  
馮世基

郭均  
庫狄嶽

隋書卷四十七

列傳第十二

韋師康

弟洸  
從父弟壽

藝

冲

柳機

子述

機弟旦

肅

從兄雄亮

從子塞之

族兄昂

昂子調

隋書卷四十八

列傳第十三

楊素

弟約

從父文思

文紀

隋書卷四十九

列傳第十四

牛弘

隋書卷五十

列傳第十五

宇文慶

李禮成

元孝矩

弟褒

郭榮

龐晃

李安

隋書卷五十一

列傳第十六

長孫覽

從子熾

熾弟晟

隋書卷五十二

列傳第十七

韓擒弟僧壽

洪

賀若弼

隋書卷五十三

列傳第十八

達奚長儒

賀婁子幹

史萬歲

劉方

馮昱

楊武通

王劼

陳永貴

李充

房兆

隋書卷五十四

列傳第十九

王長述

李衍

伊婁謙

田仁恭

元亨

杜整

李徹

崔彭

隋書卷五十五

列傳第二十

杜彥

高勣

介朱敞

周搖

獨孤楷

乞伏慧

張威

和洪

侯莫陳穎

隋書卷五十六

列傳第二十一

盧愷

令狐熙

薛胄

宇文弼



張衡

楊汪

隋書卷五十七

列傳第二十二

盧思道

從父兄昌衡

李孝貞

薛道衡

從弟孺

隋書卷五十八

列傳第二十三

明克讓

魏澹

陸爽

侯白

杜臺卿

辛德源

柳玢

許善心

李文博

隋書卷五十九

列傳第二十四

煬三子

元德太子昭

子燕王倓

越王侗

齊王暕

趙王杲

隋書卷六十

列傳第二十五

崔仲方

于仲文 兄顗 從父弟璽

段文振

隋書卷六十一

列傳第二十六

宇文述 雲定興

郭衍

隋書卷六十二

列傳第二十七

王韶

元巖

劉行本

梁毗

柳彧

趙綽

裴肅

隋書卷六十三

列傳第二十八

樊子蓋

史祥

元壽

楊義臣

衛玄

劉權

隋書卷六十四

列傳第二十九

李圓通

陳茂

張定和

張齋

麥鐵杖

沈光

來護兒

魚俱羅

陳稜

王辯 斛斯萬善

隋書卷六十五

列傳第三十

周羅暉

周法尚

李景

慕容三藏

薛世雄

王仁恭

權武

吐萬緒

董純

趙才

隋書卷六十六

列傳第三十一

李諤

鮑宏

裴政

柳莊

源師

郎茂

高構

張虔威

榮毗

兄建緒

陸知命

房彥謙

隋書卷六十七

列傳第三十二

虞世基

裴蘊

裴矩

隋書卷六十八

列傳第三十三

宇文愷

閻毗

何稠

劉龍

黃亘

弟袞



隋書卷六十九

列傳第三十四

王劭

袁充

隋書卷七十

列傳第三十五

楊玄感

李子雄  
斛斯政

趙元淑  
劉元進

李密

裴仁基

隋書卷七十一

列傳第三十六

誠節

劉弘

皇甫誕

陶模

敬釗

游元

馮慈明

張須陁

楊善會

獨孤盛

元文都

盧楚

劉子翊

堯君素

陳孝意

張季珣

松贊

隋書卷七十二

列傳第三十七

孝義

陸彥師

田德懋

薛濬

王頒

楊慶

郭雋

田翼

紐回

劉士儁

郎方貴

翟普林

李德饒

華秋

徐孝肅

隋書卷七十三

列傳第三十八

循吏

梁彥光

樊叔略

趙軌

房恭懿

公孫景茂

辛公義

柳儉郭絢敬肅

劉曠

王伽

魏德深

隋書卷七十四

列傳第三十九

酷吏

庾狄士文

田式

燕榮

趙仲卿

崔弘度弟弘昇

元弘嗣

王文同

隋書卷七十五

列傳第四十

儒林

元善

辛彥之

何妥

蕭該

包愷

房暉遠

馬光

劉焯

劉炫

褚輝

顧彪

魯世達

張冲

王孝籍

隋書卷七十六

列傳第四十一

文學

劉臻

王頔

崔儵

諸葛頴

孫萬壽

王貞

虞綽

辛大德

王胄

庾自直

潘徽

杜正玄

弟正藏

常得志

尹式

劉善經

祖君彥

孔德紹

劉斌

隋書卷七十七

列傳第四十二



隱逸

李士謙

崔廓

子賁

徐則

張文詡

隋書卷七十八

列傳第四十三

藝術

庾季才

子質

盧太翼

耿詢

韋鼎

來和

蕭吉

楊伯醜

臨孝恭

劉祐

張胄玄

許智藏

萬寶常

王令言

隋書卷七十九

列傳第四十四

外戚

高祖外家呂氏

獨孤羅

弟陀

蕭歸

子琮

琮弟璫

隋書卷八十

列傳第四十五

列女

蘭陵公主

南陽公主

襄城王恪妃

華陽王楷妃

譙國夫人

鄭善果母

孝女王舜

韓觀妻

陸讓母

劉昶女

鍾士雄母

孝婦覃氏

元務光母

裴倫妻

趙元楷妻

隋書卷八十一

列傳第四十六

東夷

高麗

百濟

新羅

靺鞨

流求

倭國

隋書卷八十二

列傳第四十七

南蠻

林邑

赤土

真臘

婆利

隋書卷八十三

列傳第四十八

西域

吐谷渾

党項

高昌

康國

安國

石國

女國

焉耆

龜茲

疏勒

于闐

鏖汗

吐火羅

挹怛

米國

史國

曹國

何國

烏那曷

穆國

波斯

漕國

附國

隋書卷八十四

列傳第四十九

北狄

突厥

西突厥

鐵勒

奚

契丹

室韋

隋書卷八十五

列傳第五十

宇文文化及

弟智及  
裴虔通

司馬德戡

王克

段達

宋本原跋



臣等謹案隋書八十五卷唐魏徵等撰其時  
顏師古孔穎達分任紀傳于志寧李淳風之  
屬分任諸志南續蕭沈北繼魏收網羅遺佚  
會通五代鄭樵謂其勝於馬班不無過當然  
當時本號爲五代史志可以單行亦未得以  
其失於限斷譏之吳兢嘗別撰隋史二十卷  
舊唐書又病其疎畧論者謂若以隋書十志  
列南北史中則兩無遺憾亦可見史家兼美

之難也乾隆四十年十月恭校上

總纂官臣紀昀臣陸錫熊臣孫士毅

總校官臣陸費墀

隋書目錄

隋書目錄考證

臣映斗

按隋即隨字與古隋字音徒果切者不同胡

三省通鑑注曰隋即春秋隨國為楚所滅以為縣秦漢屬南陽郡晉屬義陽郡後分置隨郡梁曰隨州後入西魏楊忠從周太祖以功封隨國公子堅襲爵受周禪遂以隨為國號又以周齊不遑寧處去之作隋以之訓走故也

臣召南

按改隨作隋當在文帝即位

之後此紀於父封隨公帝襲隨公進爵隨王並作隋

字蓋史官追改耳通鑑及綱目於隨公隨王並作隨字於稱帝始作隋字可為確實

李穆子渾○目錄渾譌軍

秦孝王俊子浩○目錄浩譌皓

柳機從兄雄亮○目錄譌分雄亮為兩人名

韓擒○目錄有虎字按本傳不增虎字

高勣○目錄勣譌勵按本傳及北史俱作勣

獨孤楷○目錄楷譌諧按本傳及北史俱作楷

李孝貞○目錄作李元操按本傳李孝貞字元操開  
皇初為犯廟諱於是稱字傳仍作李孝貞

張齋○目錄齋謚作大淵二字

劉元進○目錄進謚振

陶模○目錄模謚謨

劉士儁○目錄士謚仕

王頰○目錄頰謚頤

常得志尹式劉善經祖君彥孔德紹劉斌○已上六

傳目錄遺脫今增

高祖外家呂氏○目錄遺脫今增

襄城王恪妃○目錄無恪字按本傳有

華陽王楷妃○目錄無楷字按本傳有

陸讓母○目錄讓譌襄

挹怛○目錄怛譌恒下行國字從本傳刪正

契丹

室韋

○目錄契丹下附注靺鞨

臣映斗

按靺鞨

前卷自有傳彼傳云西北與契丹相接契丹傳僅

云其俗頗與鞞鞫同非附傳也今刪

隋書目錄考證



欽定四庫全書薈要卷四千六百四十五

史部

隋書卷一

唐 特 進 臣 魏 徵 上

帝紀第一

高祖上

高祖文皇帝姓楊氏諱堅弘農郡華陰人也漢太尉震八代孫鉉仕燕為北平太守鉉生元壽後魏代為武川鎮司馬子孫因家焉元壽生太原太守惠嘏嘏生平原

太守烈烈生寧遠將軍禎禎生忠忠即皇考也皇考從  
周太祖起義關西賜姓普六茹氏位至柱國大司空隋  
國公薨贈太保謚曰桓皇妣呂氏以大統七年六月癸  
丑夜生高祖於馮翊般若寺紫氣充庭有尼來自河東  
謂皇妣曰此兒所從來甚異不可於俗間處之尼將高  
祖舍於別館躬自撫養皇妣嘗抱高祖忽見頭上角出  
徧體鱗起皇妣大駭墜高祖於地尼自外入見曰已驚  
我兒致令晚得天下為人龍額額上有玉柱入頂目光

外射有文在手曰王長上短下沈深嚴重初入太學雖至親昵不敢狎也年十四京兆尹薛善辟為功曹十五以太祖勲授散騎常侍車騎大將軍儀同三司封成紀縣公十六遷驃騎大將軍加開府周太祖見而歎曰此兒風骨不似代間人明帝即位授右小宮伯進封大興郡公帝嘗遣善相者趙昭視之昭詭對曰不過作柱國耳既而陰謂高祖曰公當為天下君必大誅殺而後定善記鄙言武帝即位遷左小宮伯出為隋州刺史進位

大將軍後徵還遇皇妣寢疾三年晝夜不離左右代稱  
純孝宇文護執政尤忌高祖屢將害焉大將軍侯伏侯  
壽等匡護得免其後襲爵隋國公武帝聘高祖長女為  
皇太子妃益加禮重齊王憲言於帝曰普六如堅相貌  
非常臣每見之不覺自失恐非人下請早除之帝曰此  
止可為將耳內史王軌驟言於帝曰皇太子非社稷主  
普六如堅貌有反相帝不悅曰必天命有在將若之何  
高祖甚懼深自晦匿建德中率水軍三萬破齊師於河

橋明年從帝平齊進位柱國宇文憲破齊任城王高潛  
於冀州除定州總管先是定州城西門久閉不行齊文  
宣帝時或請開之以便行路帝不許曰當有聖人來啟  
之及高祖至而開焉莫不驚異尋轉亳州總管宣帝即  
位以后父徵拜上柱國大司馬大象初遷大後丞右司  
武俄轉大前疑每巡幸恒委居守時帝為刑經聖制其  
法深刻高祖以法令滋章非興化之道切諫不納高祖  
位望益隆帝頗以為忌帝有四幸姬並為皇后諸家爭

寵數相毀譖帝每忿怒謂后曰必族滅爾家因召高祖  
命左右曰若色動即殺之高祖既至容色自若乃止大  
象二年五月以高祖為揚州總管將發暴有足疾不果  
行乙未帝崩時靜帝幼冲未能親理政事內史上大夫  
鄭譯御正大夫劉昉以高祖皇后之父衆望所歸遂矯  
詔引高祖入總朝政都督內外諸軍事周氏諸王在藩  
者高祖悉恐其生變稱趙王招將嫁女於突厥為詞以  
徵之丁未發喪庚戌周帝拜高祖假黃鉞左大丞相百

官總已而聽焉以正陽宮為丞相府以鄭譯為長史劉  
昉為司馬具置寮佐宣帝時刑政苛酷羣心崩駭莫有  
固志至是高祖大崇惠政法令清簡躬履節儉天下悅  
之六月趙王招陳王純越王盛代王達滕王迥並至于  
長安相州總管尉遲迥自以重臣宿將志不能平遂舉  
兵東夏趙魏之士從者若流旬日之間衆至十餘萬又  
宇文弔以滎州石碯以建州席毗以沛郡毗弟義羅以  
兗州皆應於迥迥遣子質於陳請援高祖命上柱國鄖

國公韋孝寬討之雍州牧畢王賢及趙陳等五王以天下之望歸於高祖因謀作亂高祖執賢斬之寢趙王等之罪因詔五王劔履上殿入朝不趨用安其心七月陳將陳紀蕭摩訶等寇廣陵吳州總管于顗轉擊破之廣陵人杜喬生聚衆反刺史元義討平之韋孝寬破尉遲迴於相州傳首闕下餘黨悉平初迴之亂也鄆州總管司馬消難據州響應淮南州縣多同之命襄州總管王誼討之消難奔陳荆郢羣蠻乘釁作亂命亳州總管賀



若誼討平之先是上柱國王謙為益州總管既見幼主  
在位政由高祖遂起巴蜀之衆以匡復為辭高祖方以  
東夏山南為事未遑致討謙進兵屯劔閣陷始州至是  
乃命行軍元帥上柱國梁睿討平之傳首闕下巴蜀阻  
險人好為亂於是更開平道毀劔閣之路立銘垂誠焉  
五王陰謀滋甚高祖齎酒肴以造趙王第欲觀所為趙  
王伏甲以宴高祖高祖幾危賴元胄以濟語在胄傳於  
是誅趙王招越王盛九月以世子勇為洛州總管東京

小冢宰壬子周帝詔曰假黃鉞使持節左大丞相都督  
內外諸軍事上柱國大冢宰隋國公堅感山河之靈應  
星辰之氣道高雅俗德協幽顯釋巾登仕搢紳傾屬開  
物成務朝野承風受詔先皇弼諧寡薄合天地而生萬  
物順陰陽而撫四夷近者內有艱虞外聞妖寇以鷹鷂  
之志運帷帳之謀行兩觀之誅掃萬里之外遐邇清肅  
實所賴焉四海之廣百官之富俱稟大訓咸餐至道治  
定功成棟梁斯託神猷盛德莫二於時可授大丞相罷

左右丞相之官餘如故冬十月壬申詔贈高祖曾祖烈  
為柱國太保都督徐兗等十州諸軍事徐州刺史隋國  
公謚曰康祖禎為柱國太傅都督陝蒲等十三州諸軍  
事同州刺史隋國公謚曰獻考忠為上柱國太師大冢  
宰都督冀定等十三州諸軍事雍州牧誅陳王純癸酉  
上柱國鄖國公韋孝寬卒十一月辛未誅代王達滕王  
逌十二月甲子周帝詔曰天大地大合其德者聖人一  
陰一陽調其氣者上宰所以降神載挺陶鑄羣生代蒼

蒼之功成巍巍之業假黃鉞使持節大丞相都督內外  
諸軍事上柱國大冢宰隋國公應百代之期當千齡之  
運家隆台鼎之盛門有翊贊之勤心同伊尹必致堯舜  
情類孔丘憲章文武爰初入仕風流映世公卿仰其軌  
物措紳謂為師表入處禁闈出居藩政芳猷茂績問望  
彌遠往平東夏人情未安燕南趙北實為天府擁節杖  
旄任當連率柔之以德導之以禮畏之若神仰之若日  
芳風美迹歌頌獨存淮海榛蕪多歷年代作鎮南鄙選

衆惟賢威震殊俗化行黔首任掌鈞陳職司邦政國之  
大事朝寄更深鑾駕巡遊留臺務廣周公陝西之任僅  
可為倫漢臣關內之重未足相況及天崩地坼先帝升  
遐朕以眇年奄經荼毒親受顧命保乂皇家姦人乘隙  
潛圖宗社無君之意已成竊發之期有日英規潛運大  
畧川迴匡國庇人罪人斯得兩河遘亂三魏稱兵半天  
之下洶洶鼎沸祖宗之基已危生人之命將殆安陸作  
釁南通吳越蜂飛蠆聚江漢騷然巴蜀鴟張鸛將問鼎

秦塗更阻漢門重閉畫籌帷帳建出師車諸將稟其謀  
壯士感其義不違時日咸得清蕩九功遠被七德允諧  
百僚師師四門穆穆光景照臨之地風雲去來之所允  
武允文幽明同德驟山驟水遐邇歸心使朕繼踵上皇  
無為以治聲高宇宙道格天壤伊尹輔殷霍光佐漢方  
之蔑如也昔營丘曲阜地多諸國重耳小白錫用殊禮  
蕭何優贊拜之儀番君越公侯之爵姬劉以降代有令  
謨宜崇典禮憲章自昔可授相國總百揆去都督內外

諸軍事大冢宰之號進公爵為王以隋州之崇業鄖州之安陸城陽溫州之宜人應州之平靖上明順州之淮南士州之永川昌州之廣昌安昌申州之義陽淮安息州之新蔡建安豫州之汝南臨潁廣寧初安蔡州之蔡陽郢州之漢東二十郡為隋國劔履上殿入朝不趨贊拜不名備九錫之禮加璽紱遠遊冠相國印綵綬綬位在諸侯王上隋國置丞相已下一依舊式高祖再讓不許乃受王爵十郡而已詔進皇祖考爵並為王夫人為

王妃辛巳司馬消難以陳師寇江州刺史成休寧擊却之大定元年春二月壬子令曰已前賜姓皆復其舊是日周帝詔曰伊周作輔不辭殊禮之錫桓文為霸允應異物之典所以表格天之勲彰不代之業相國隋王前加典策式昭大禮固守謙光絲言未紵宜申顯命一如往旨王功必先人賞存後已退讓為本誠乖朕意宜命百辟盡詣王宮衆心克感必令允納如有表奏勿復以聞癸丑文武百官詣閤敦勸高祖乃受甲寅策曰咨爾



假黃鉞使持節大丞相都督內外諸軍事上柱國大冢  
宰隋王天覆地載藉人事以財成日往月來由王道而  
盈昃五氣陶鑄萬物流形誰代上玄之工斯則大聖而  
已曰惟先正翊亮皇朝種德積善載誕上相精采不代  
風骨異人匡國濟時除凶撥亂百神奉職萬國宅心殷  
相以先知悟人周輔乃弘道於代方斯蔑如也今將授  
王典禮其敬聽朕命朕以不德早承丕緒上靈降禍風  
遭愍凶妖醜覲密圖社稷宮省之內疑慮驚心公受

命先皇志在匡弼輯諧內外潛運機衡姦人懾憚謀用  
丕顯俾贅旒之危為太山之固是公重造皇室作霸之  
基也伊我祖考之代任寄已深入掌禁兵外司藩政文  
經武畧久播朝野戎軒大舉長驅晉魏平陽震熊羆之  
勢冀部耀貔貅之威初平東夏人情未一叢臺之北易  
水之南西距井陘東至滄海比數千里舉袂如帷委以  
連城建旌杖節教因其俗刑用輕典如泥從印猶草隨  
風此又公之功也吳越不賓多歷年代淮海之外時非

國有爰整其旅出鎮於亳武以威物文以懷遠羣盜自  
奔外戶不閉人黎慕義襁負而歸自北之風化行南國  
此又公之功也宣帝御寓任重宗臣入典八屯外司九  
伐禁衛勤巡警之務治兵得蒐狩之禮此又公之功也  
鑾駕遊幸頻委留臺文武注意軍國諮稟萬事咸理反  
顧無憂此又公之功也朕在諒闇公實總已磐石之宗  
姦回者衆招引無賴連結羣小往者國哀甫爾已創陰  
謀積惡數旬昆吾方稔泣誅磬甸宗廟以寧此又公之

功也尉迴猖狂稱兵鄴邑欲長戟而指北闕强弩而圍  
南斗憑陵三魏之間震驚九州之半聚徒百萬悉成蛇  
豕淇水洹水一飲而竭人之死生翻繫凶豎壽之長短  
不由司命公乃戒彼鷹揚出車練卒誓蒼兕於河朔建  
瓴水於東山口授兵書手畫行陣量敵制勝指日尅期  
諸將遵其成旨壯士感其大義輕死忘生轉鬪千里旗  
鼓奮發如火燎毛玄黃變漳河之水京觀比爵臺之峻  
百城氛祲一旦廓清此又公之功也青土連率跨據東

秦藉負海之饒倚連山之險望三輔而將逐鹿指六國而願連雞風雨之兵助鬼為虐本根既拔枝葉自隕屈法申恩示以大信此又公之功也申部殘賊充斥一隅蠅飛蟻聚攻州畧地播以玄澤迷更知反服而舍之無費遺鏃此又公之功也宇文胄親則宗枝外藩巖邑影響鄴賊有同就燥迫脅吏人叛換城戍偏師討賊遂入網羅束之武牢有同囹圄事窮將軍如伏國刑此又公之功也擅讓席毗擁衆河外陳韓梁鄭宋衛鄒魯村落

成梟獍之墟人庶為豺狼之餌強以陵弱大則吞小城  
有晝閉卷無行人授律出師隨機掃定讓既授首毗亦  
梟懸此又公之功也司馬消難與國親姻作鎮安陸性  
多嗜欲意好貪聚屬城子女劫掠靡餘部入貨財多少  
具罄擅誅刺舉之使專殺儀台之臣懼罪畏威動而內  
憂蠶食郡縣鳩毒華夷聞有王師自投南裔帝唐崇山  
之罰僅可方此大漢流禦之刑是亦相匹逋逃入藪荆  
郢用安此又公之功也王謙在蜀翻為厲階閉劔閣之

門塞靈關之宇自謂五丁復起萬夫莫向分閫推轂嘗  
不踰時風馳席卷一舉大定擒斬兇惡掃地無遺此又  
公之功也陳項因循偽業自擅金陵屢遣醜徒赳赳江  
北公指麾藩鎮無不推珍方置文深之柱非止尉佗之  
拜此又公之功也公有濟天下之勤重之以明德始於  
辟命屈已登庸素業清微聲掩廊廟雄規神畧氣蓋朝  
野序百揆而穆四門恥一匡之舉九合尊賢崇德尚齒  
貴功錄舊旌善興亡繼絕寬猛相濟彝倫攸叙敦睦帝

親崇獎王室星象不拆陰陽自調玄冥祝融如奉太公  
之名雨師風伯似應成王之宰祥風嘉氣解石搖林瑞  
獸異禽遊園鳴閣至功至德可大可久盡品物之和究  
杳冥之極朕又聞之昔者明王設官胙土營丘四履得  
征五侯參墟寵章異其禮物故藩屏作固垂拱責成沉  
嘿巖廊不下堂席公道高往烈賞薄前王朕以眇身託  
于兆人之上求諸故實甚用懼焉往加大典憲章在昔  
謙以自牧未應朝禮日月不居便已隔歲時談物議其



謂朕何今進授相國總百揆以申州之義陽等二十郡  
為隋國今命使持節太傅上柱國杞國公椿大宗伯大  
將軍金城公趙熒授相國印綬相國禮絕百辟任總羣  
官舊職常典宜與事革昔堯臣大尉舜佐司空姬旦相  
周霍光輔漢不居藩國唯在天朝其以相國總百揆去  
衆號焉上所假節大丞相大冢宰印綬又加九錫其敬  
聽朕後命以公執律脩德慎獄恤刑為其訓範人無異  
志是用錫公大輅戎輅各一玄牡二駟公勤心地利所

寶人天崇本務農公私殷阜是用錫公袞冕之服赤舄

副焉公樂以移風雅以變俗遐邇胥悅天地咸和是用

錫公軒懸之樂六佾之舞公仁風德教覃及海隅荒忽

幽遐迴首內向是用錫公朱戶以居公水鏡人倫銓衡

庶職能官流詠遺賢必舉是用錫公納陛以登公執鈞

於內正性率下犯義無禮罔不屏黜是用錫公武賁之

士三百人公

各本闕

是用錫公鈇鉞各一公威嚴夏日精

勵秋霜夏必誅顧眄天壤掃清姦宄折衝無外是用

錫公彤弓一彤矢百盧弓十盧矢千惟公孝通神明肅  
恭祀典尊嚴如在情切幽明是用錫公秬鬯一卣珪瓚  
副焉隋國置丞相以下一遵舊式往欽哉其敬循往策  
祇服大典簡恤爾庶功對揚我太祖之休命於是建臺  
置官景辰詔王冕十有二旒建天子旌旗出警入蹕乘  
金根車駕六馬備五時副車置旄頭雲罕樂舞八佾設  
鐘虞宮懸王妃為王后長子為太子前後三讓乃受俄  
而周帝以衆望有歸乃下詔曰元氣肇闢樹之以君有

命不恒所輔惟德天心人事選賢與能盡四海而樂推

非一人而獨有周德將盡妖孽遞生骨肉多虞藩維構

釁影響同惡過半區宇或小或大圖帝圖王則我祖宗

之業不絕如線相國隋王叡聖自天英華獨秀刑法與

禮儀同運文德共武功俱遠愛萬物其如已任兆庶以

為憂手運璣衡躬命將士芟夷姦宄刷蕩氛祲化通冠

帶威震幽遐虞舜之大功二十未足相比姬發之合位

三五豈可足論況木行已謝火運既興河洛出革命之

符星辰表代終之象烟雲改色笙簧變音獄訟咸歸謳  
歌盡至且天地合德日月貞明故以稱大為王照臨下  
土朕雖寡昧未達變通幽顯之情皎然易識今便祇順  
天命出遜別宮禪位於隋一依唐虞漢魏故事高祖三  
讓不許遣兼太傅上柱國把國公椿奉冊曰咨爾相國  
隋王粵若上古之初爰啓清濁降符授聖為天下君事  
上帝而理兆人和百靈而利萬物非以區寓之富未以  
宸極為尊大庭軒轅以前驪連赫胥之日咸以無為無

欲不將不迎遐哉其詳不可聞已厥有載籍遺文可觀  
聖莫逾於堯美未過於舜堯得太尉已作運衡之篇舜  
遇司空便叙精華之竭彼褰裳脫屣貳宮設饗百辟歸  
禹若帝之初斯蓋上則天時不敢不授下祇天命不可  
不受湯代於夏武革於殷干戈揖讓雖復異揆應天順  
人其道靡異自漢迄晉有魏至周天厯逐獄訟之歸神  
鼎隨謳歌之去道高者稱帝錄盡者不王與夫文祖神  
宗無以別也周德將盡禍難頻興宗戚姦回咸將竊發

顧瞻宮闕將圖宗社藩維連率逆亂相尋搖蕩三方不  
合如礪蛇行鳥攫投足無所王受天明命獻德在躬救  
頽運之艱匡墜地之業拯大川之溺撲燎原之火除羣  
凶於城社廓妖氛於遠服至德合於造化神用洽於天  
壤八極九野萬方四裔圓首方足罔不樂推往歲長星  
夜掃經天晝見八風比夏后之作五緯同漢帝之聚除  
舊之徵昭然在上近者赤雀降祉玄龜效靈鐘石變音  
蛟魚出穴布新之貺煥焉在下九區歸往百靈協贊人

神屬望我不獨知仰祇皇靈俯順人願今敬以帝位禪  
於爾躬天祚告窮天祿永終於戲王宜允執厥和儀刑  
典訓升圓丘而敬蒼昊御皇極而撫黔黎副率土之心  
恢無疆之祚可不盛歟遣大宗伯大將軍金城公趙襲  
奉皇帝璽紱百官勸進高祖乃受焉

開皇元年二月甲子上自相府常服入宮備禮即皇帝  
位於臨光殿設壇於南郊遣使柴燎告天是日告廟大  
赦改元京師慶雲見易周氏官儀依漢魏之舊以柱國



相國司馬渤海郡公高頻為尚書左僕射兼納言相國  
司錄沁源縣公虞慶則為內史監兼吏部尚書相國內  
郎咸安縣男李德林為內史令上開府漢安縣公韋世  
康為禮部尚書上開府義寧縣公元暉為都官尚書開  
府民部尚書昌國縣公元巖為兵部尚書上儀同司宗  
長孫毗為工部尚書上儀同司會揚尚希為度支尚書  
上柱國雍州牧邗國公楊惠為左衛大將軍乙丑追尊  
皇考為武元皇帝廟號太祖皇妣為元明皇后遣八使

巡省風俗景寅脩廟社立王后獨孤氏為皇后王太子  
勇為皇太子丁卯以大將軍金城郡公趙襲為尚書右  
僕射上開府濟陽侯伊婁彥恭為左武侯大將軍己巳  
以周帝為介國公邑五千戶為隋室賓旌旗車服禮樂  
一如其舊上書不為表答表不稱詔周氏諸王盡降為  
公辛未以皇弟同安郡公爽為雍州牧乙亥封皇弟邵  
國公慧為滕王同安公爽為衛王皇子鴈門公廣為晉  
王俊為秦王秀為越王諒為漢王以上柱國并州總管

申國公李穆為太師上柱國鄧國公竇熾為太傅上柱  
國幽州總管任國公于翼為太尉觀國公田仁恭為太  
子太師武德郡公柳敏為太子太保濟南郡公孫恕為  
太子少傅開府蘇威為太子少保丁丑以晉王廣為并  
州總管以陳留郡公楊智積為蔡王興城郡公楊靜為  
道王戊寅以官牛五千頭分賜貧人三月辛巳高平獲  
赤雀太原獲蒼烏長安獲白雀各一宣仁門槐樹連理  
衆枝內附壬午白狼國獻方物甲申太白晝見乙酉又

畫見以上柱國元景山為安州總管丁亥詔犬馬器玩  
口味不得獻上戊子弛山澤之禁以上開府當亭縣公  
賀若弼為楚州總管和州刺史新義縣公韓擒虎為廬  
州總管己丑盤屋縣獻連理樹植之宮庭辛卯以上柱  
國神武郡公竇毅為定州總管戊戌以太子少保蘇威  
兼納言吏部尚書餘官如故庚子詔曰自古帝王受終  
革代建侯錫爵多與運遷朕應籙受圖君臨海內載懷  
公革事有不同然則前帝後王俱在兼濟立功立事爵

賞仍行苟利於時其致一揆何謂物我之異無計今古  
之殊其前代品爵悉可依舊丁未梁主蕭歸使其太宰  
蕭巖司空劉義來賀四月辛巳大赦壬午太白歲星晝  
見戊戌太常散樂並放為百姓禁雜樂百戲辛丑陳散  
騎常侍韋鼎兼通直散騎常侍王瑳來聘于周至而上  
已受禪致之介國是月發稽胡修築長城二旬而罷五  
月戊子封邗國公揚雄為廣平王永康郡公楊弘為河  
間王辛未介國公薨上舉哀於朝堂以其族人洛嗣焉

六月癸未詔以初受天命赤雀降祥五德相生赤為火  
色其郊及社廟衣服冕之儀而朝會之服旗幟犧牡盡  
令尚赤戎服以黃秋七月乙卯上始服黃百寮畢賀庚  
午靺鞨酋長貢方物八月壬午廢東京官寔厥阿波可  
汗遣使貢方物甲午遣行軍元帥樂安公元諧擊吐谷  
渾於青海破而降之九月戊申戰亡之家遣使賑給庚  
午陳將周羅睺攻陷胡豎蕭摩訶寇江北辛未以越王  
秀為益州總管改封為蜀王壬申以上柱國薛國公長

孫覽上柱國宋安公元京山並為行軍元帥以伐陳仍  
命尚書左僕射高頻節度諸軍突厥沙鉢畧可汗遣使  
貢方物是月行五銖錢冬十月乙酉百濟王扶餘昌遣  
使來賀授昌上開府儀同三司帶方郡公戊子行新律  
壬辰行幸岐州十一月乙卯以永昌郡公竇榮定為右  
武侯大將軍丁卯遣兼散騎侍郎鄭撫使於陳巳巳有  
流星聲如墮牆光燭于地十二月戊寅以申州刺史爾  
朱敬為金州總管甲申以禮部尚書韋世康為吏部尚

書己丑以柱國元袞為廓州總管興勢郡公衛玄為淮  
州總管庚子至自岐州壬寅高麗王高陽遣使朝貢授  
陽大將軍遼東郡公太子太保抑敏卒

二年春正月癸丑幸上柱國王誼第庚申幸安成長公  
主第陳宣帝殂子叔寶立辛酉置河北道行臺尚書省  
於并州以晉王廣為尚書令置河南道行臺尚書省於  
洛州以秦王俊為尚書令置西南道行臺尚書省於益  
州以蜀王秀為尚書令戊辰陳遣使請和歸我胡墅辛



未高麗百濟並遣使貢方物甲戌詔舉賢良二月己丑  
詔高顯等班師庚寅以晉王廣為左武衛大將軍秦王  
俊為右武衛大將軍餘官並如故辛卯幸趙國公獨孤  
陀第庚子京師雨土三月戊申開渠引杜陽水於三時  
原四月丁丑以寧州刺史竇榮定為左武侯大將軍庚  
寅大將軍韓僧壽破突厥於雞頭山上柱國李充破突  
厥於河北山五月戊申以上柱國開府長孫平為度支  
尚書己酉早上親省囚徒其日大雨己未高寶寧寇平

州突厥入長城庚申以豫州刺史皇甫績為都官尚書  
壬戌太尉任國公于翼薨甲子改傳國璽曰受命璽六  
月壬午以太府卿蘇孝慈為兵部尚書雍州牧衛王爽  
為原州總管甲申使使弔於陳國乙酉上柱國李充破  
突厥於馬邑戊子以上柱國叱李長義為蘭州總管辛  
卯以上開府爾朱敬為徐州總管景申詔曰朕祇奉上  
玄君臨萬國屬生人之敬處前代之宮常以為作之者  
勞居之者逸改創之事心未遑也而王公大臣陳謀獻

策咸云義農以降至于姬劉有當代而屢遷無革命而  
不徙曹馬之後時見因循乃末代之晏安非往聖之宏  
義此城從漢彫殘日久屢為戰場舊經喪亂今之宮室  
事近權宜又非謀筮從龜瞻星揆日不足建皇王之邑  
合大衆所聚論變通之數具幽顯之情同心固請詞情  
深切然則京師百官之府四海歸向非朕一人之所獨  
有苟利於物其可違乎且殷之五遷恐人盡死是則以  
吉凶之士制長短之命謀新去故如農望秋雖暫劬勞

其究安宅今區宇寧一陰陽順序安安以遷勿懷胥怨  
龍首山川原秀麗卉物滋阜卜食相土宜建都邑定鼎  
之基永固無窮之業在斯公私府宅規模遠近營構資  
費隨事條奏仍詔左僕射高頻將作大匠劉龍鉅鹿郡  
公賀婁子幹太府少卿高龍又等創造新都秋八月癸  
巳以左武侯大將軍竇榮定為秦州總管十月癸酉皇  
太子勇屯兵咸陽以備胡庚寅上疾愈享百寮於觀德  
殿賜錢帛皆任其自取盡力而出辛卯以營新都副監

賀婁子幹為工部尚書十一月景午高麗遣使獻方物  
十二月辛未上講武於後園甲戌上柱國竇毅卒景子  
名新都曰大興城乙酉遣沁源公虞慶則屯弘化備胡  
突厥寇周槃行軍總管達奚長儒擊之為虜所敗景戌  
賜國子生經明者束帛丁亥親錄囚徒

三年春正月庚子將入新都大赦天下禁大刀長稍癸  
亥高麗遣使來朝二月己巳朔日有蝕之壬申宴北道  
勲人癸酉陳遣兼散騎常侍賀徹兼通直散騎常侍蕭

褒來聘突厥寇邊甲戌涇陽獲毛龜癸未以左衛大將軍李禮成為右武衛大將軍三月丁未上柱國鮮虞縣公謝慶恩卒己酉以上柱國達奚長儒為蘭州總管景辰雨常服入新都京師醴泉出丁巳詔購求遺書於天下庚申宴百寮班賜各有差癸亥城榆關夏四月己巳上柱國建平郡公子義卒庚午吐谷渾寇臨洮洮州刺史皮子信死之辛未高麗遣使來朝壬申以尚書右僕射趙襲兼內史令丁丑以滕王瓚為雍州牧己卯衛王

爽破突厥於白道庚辰行軍總管陰壽破高寶寧於黃  
龍甲申早上親祈雨於國城之西南景戌詔天下勸學  
行禮以濟北郡公梁遠為汶州總管己丑陳郢州城主  
張子譏遣使請降上以和好不納辛卯遣兼散騎常侍  
薛舒兼通直散騎常侍王劭使於陳癸巳上親雩甲午  
突厥遣使來朝五月癸卯行軍總管李晃破突厥於摩  
那渡口甲辰高麗遣使來朝乙巳梁太子蕭琮來賀遷  
都丁未靺鞨貢方物戊申幽州總管陰壽卒辛酉有事

於方澤壬戌行軍元帥竇榮定破突厥及吐谷渾於涼  
州景寅赦黃龍死罪已下六月庚午以衛王爽子集為  
遂安郡王戊寅突厥遣使請和庚辰行軍總管梁遠破  
吐谷渾於爾汗山斬其名王壬申以晉州刺史燕榮為  
青州總管己丑以河間王弘為寧州總管乙未辛安成  
長公主第秋七月辛丑以豫州刺史周搖為幽州總管  
壬戌詔曰行仁蹈義名教所先厲俗敦風宜見褒獎往  
者山東河表經此妖亂孤城遠守多不自全濟陰太守



杜猷身陷賊徒命懸寇手郡省事范臺玖傾產營護免  
其戮辱眷言誠節實有可嘉宜超恒賞用明沮勸臺玖  
可大都督假湘州刺史丁卯日有蝕之八月丁丑鞅鞅  
貢方物己卯以右武衛大將軍李禮成為襄州總管壬  
午遣尚書左僕射高潁出寧州道內史監虞慶則出原  
州道並為行軍元帥以擊胡戊子上有事於太社九月  
壬子幸城東觀稼穀癸丑大赦天下冬十月甲戌廢河  
南道行臺省以秦王俊為秦州總管十一月己酉發使

巡省風俗因下詔曰朕君臨區宇深思治術欲使生人從化以德代刑求草萊之善旌閭里之行民間情偽咸欲備聞已詔使人所在賑恤揚鑣分路將遍四海必令為朕耳目如有文武才用未為時知宜以禮發遣朕將銓擢其有志節高妙越等超倫亦仰使人就加旌異令一行一善獎勸於人遠近官司遐邇風俗巨細必紀還日奏聞庶使不出戶庭坐知萬里庚辰陳遣散騎常侍周墳通直散騎常侍袁彥來聘陳主知上之貌異世人

使彥畫像持去甲午罷天下諸郡閏十二月乙卯遣兼散騎常侍曹令則通直散騎常侍魏澹使於陳戊午以上柱國竇榮定為右武衛大將軍刑部尚書蘇威為民部尚書

四年春正月甲子日有蝕之己巳有事於太廟辛未有事于南郊壬申梁王蕭歸來朝甲戌大射於北苑十日而罷壬午齊州水辛卯渝州獲獸似麋一角同蹄壬辰班新厯二月乙巳上餞梁王於霸上丁未靺鞨貢方物

突厥蘇尼部男女萬餘人來降庚戌幸隴州突厥可汗  
阿史那玷率其屬來降夏四月己亥勅總管刺史父母  
及子年十五已上不得將之官庚子以吏部尚書虞慶  
則為尚書右僕射瀛州刺史楊尚希為兵部尚書毛州  
刺史劉仁恩為刑部尚書甲辰以上柱國叱李長義為  
信州總管丁未宴突厥高麗吐谷渾使者於大興殿丁  
巳以上大將軍賀婁子幹為榆關總管五月癸酉契丹  
主莫賀弗遣使請降拜大將軍景子以柱國馮昱為汾

州總管乙酉以汴州刺史呂仲泉為延州總管六月庚  
子降囚徒乙巳以鴻臚卿乙弗寔為冀州總管上柱國  
豆盧勣為夏州總管壬子開渠自渭達河以通運漕戊  
午秦王俊來朝秋七月景寅陳遣兼散騎常侍謝泉兼  
通直散騎常侍賀德基來聘八月甲午遣十使巡省天  
下戊戌衛王爽來朝是日以秦王俊納妃宴百寮班賜  
各有差壬寅上柱國太傅鄧國公竇熾薨丁未宴秦王  
官屬賜物各有差壬子享陳使乙卯陳將夏侯苗請降

上以通和不納九月甲子幸襄國公主第乙丑幸霸水  
觀漕渠賜督役者帛各有差己巳上親錄囚徒庚午契  
丹內附甲戌駕幸洛陽關內饑也癸未太白晝見冬十  
一月壬戌遣兼散騎常侍薛道衡通直散騎常侍豆盧  
寔使於陳癸亥以掄闢總管賀婁子幹為雲州總管

五年春正月戊辰詔行新禮三月戊午以尚書左僕射  
高顯為左領軍大將軍上柱國宇文忻為右領軍大將  
軍夏四月甲午契丹主多彌遣使貢方物壬寅上柱國

王誼謀反伏誅乙巳詔徵山東馬榮伯等六儒戊申車  
駕至自洛陽五月甲申詔置義倉梁主蕭巋殂其太子  
琮嗣立遣上大將軍元契使于突厥阿波可汗秋七月  
庚申陳遣兼散騎常侍王詒兼通直散騎常侍阮卓來  
聘丁丑以上柱國宇文慶為涼州總管壬午突厥沙鉢  
略上表稱臣八月景戌沙鉢略可汗遣子庫合真特勒  
來朝甲辰河南諸州水遣民部尚書邳國公蘇威賑給  
之戊申有流星數百四散而下己酉幸栗園九月丁巳

至自栗園乙丑改鮑陂曰杜陂霸水為滋水陳將湛文  
徹寇和州儀同三司費寶首獲之景子遣兼散騎常侍  
李若兼通直散騎常侍崔君瞻使於陳冬十月壬辰以  
上柱國揚素為信州總管朔州總管吐萬緒為徐州總  
管十一月甲子以上大將軍源雄為朔州總管丁卯晉  
王廣來朝十二月丁未降囚徒戊申以上柱國達奚長  
儒為夏州總管

六年春正月甲子党項羌內附庚午班厯於突厥辛未



以柱國韋洸為安州總管壬申遣民部尚書蘇威巡省

山東二月乙酉山南荆浙七州水遣前工部尚書長孫  
毗賑恤之景戌制刺史上佐每歲暮更入朝上考課丁  
亥發丁男十一萬修築長城二旬而罷乙未以上柱國  
崔弘度為襄州總管庚子大赦天下三月己未洛陽男  
子高德上書請上為太上皇傳位皇太子上曰朕承天  
命撫育蒼生日旰食猶恐不逮豈學近代帝王事不  
師古傳位於子自求逸樂者哉癸亥突厥沙鉢略遣使

貢方物夏四月己亥陳遣兼散騎常侍周礪兼通直散  
騎常侍江椿來聘秋七月辛亥河南諸州水乙丑京師  
雨毛如馬鬣尾長者二尺餘短者六七寸八月辛卯關  
內七州旱免其賦稅遣散騎常侍裴豪兼通直散騎常  
侍劉顥聘于陳戊申上柱國太師申國公李穆薨閏月  
己酉以河州刺史段文振為蘭州總管丁卯皇太子鎮  
洛陽辛未晉王廣秦王俊並來朝景子上柱國邠國公  
梁士彥上柱國杞國公宇文忻柱國舒國公劉昉以謀

反伏誅上柱國許國公宇文善坐事除名九月辛巳上  
素服御射殿詔百寮射賜梁士彥三家資物景戌上柱  
國宋安郡公元景山卒庚子以上柱國李詢為隰州總  
管辛丑詔大象已來死事之家咸命賑恤冬十月己酉  
以河北道行臺尚書令并州總管晉王廣為雍州牧餘  
官如故兵部尚書楊尚希為禮部尚書癸丑置山南道  
行臺尚書省於襄州以秦王俊為尚書令景辰以芳州  
刺史駱平難為疊州刺史衡州總管周法尚為黃州總

管甲子甘露降于華林園

七年春正月癸巳有事于太廟乙未制諸州歲貢三人  
二月丁巳祀朝日于東郊巳巳陳遣兼散騎常侍王亨  
兼通直散騎常侍王春來聘壬申車駕幸醴泉宮是月  
發丁男十萬餘修築長城二旬而罷夏四月巳酉幸晉  
王第庚戌於揚州開山陽瀆以通運漕突厥沙鉢略可  
汗卒其子雍虞閭嗣立是為都藍可汗癸亥頒青龍符  
於東方總管刺史西方以騶虞南方以朱雀北方以玄

武甲戌遣兼散騎常侍楊同兼通直散騎常侍崔儵使  
于陳以民部尚書蘇威為吏部尚書五月乙亥朔日有  
蝕之己卯雨石于武安滏陽間十餘里秋七月己丑衛  
王爽薨上發喪於門下外省八月景午以懷州刺史源  
雄為朔州總管庚申梁主蕭琮來朝九月乙酉梁安平  
王蕭巖掠於其國以奔陳辛卯廢梁國曲赦江陵以梁  
主蕭琮為柱國封莒國公冬十月庚申行幸同州以先  
帝所居降囚徒癸亥幸蒲州景寅宴父老上極懽曰此

間人物衣服鮮麗容止閑雅良由仕官之鄉陶染成俗也十一月甲午幸馮翊親祠故社父老對詔失旨上大怒免其縣官而去戊戌至自馮翊

隋書卷一

隋書卷一考證

高祖紀上代為武川鎮司馬○代當作世唐諱後倣此  
為人龍領額上有玉柱入頂○監本龍領訛龍顏玉柱  
訛五柱從北史改

帝嘗遣善相者趙昭視之○

臣召南

按北史作善相者

來和以藝術傳証之來和是也北史出於是書之後  
故訂正其失耳

越王盛代王達○監本訛作越王達代王盛下文又作

誅越王盛代王達兩名互異

臣映斗

按周書及北史

俱載越野王名盛代罌王名達從之改正

俾贅旒之危○一本贅訛綴

臣映斗

按詩商頌為下國

綴旒箋以與諸侯會同結定其心如旌旗之旒終著  
焉又公羊傳君若贅旒然注旒旗旒贅繫屬之辭以  
旂旒喻者為下所執持東西是綴旒與贅旒意正相  
反不可混也

泣誅磬甸○監本磬作罄按禮記文王世子公族其刑



有死罪則磬於甸人今改正

尉迥猖狂○

臣腴斗

按尉迥即尉遲迥見前已後多作

尉迥魏書官氏志西方尉遲氏後改為尉氏今仍本文以見姓氏因革

方置文深之柱○

臣宗萬

按深當作淵唐諱後漢書馬

援字文淵注廣州記曰援到交趾立銅柱為漢之極界

盧弓十盧矢千○左傳王賜晉絃弓矢千絃通作盧

景辰○景當作丙唐諱後倣此

錄盡者不王○監本作祿一本作錄從宋本改

王宜允執厥和○和當從書經作中隋諱嫌名

以陳留郡公楊智積為蔡王○監本蔡訛察從宋本改

韓擒虎○唐諱虎此乃後人所加後倣此

興勢郡公○監本勢訛執從閣本改

隋書卷一考證

謹案目錄第十六頁前八行來護免刊本來訛麥  
據監本改

第十九頁前七行紐回攷北史作紐因

第二十一頁前一行魯世達刊本世訛仲據本傳  
改

第二十二頁後二行許智歲刊本許訛劉據本傳  
及北史改


第二十三頁後一行孝婦覃氏刊本覃訛單據本

傳改

第二十四頁前一行倭國刊本倭訛倭據北史及  
諸本改

卷一第二頁前六行帝嘗遣善相者趙昭視之刊  
本善字缺據監本增

第十一頁前七行事窮將軍句疑有誤



覆校官助教臣吳省蘭

校對官修撰臣張書勲

謄錄監生臣張虎文

欽定四庫全書叢要

史部  
隋書卷五  
二至



詳校官內閣侍讀孫球

欽定四庫全書會要卷四千六百四十六

史部

隋書卷二

唐 特 進 臣 魏 徵 上



高祖下

八年春正月乙亥陳遣散騎常侍袁雅兼通直散騎常侍周止水來聘二月庚子鎮星入東井辛酉陳人寇硤州三月辛未上柱國隴西郡公李詢卒壬申以成州刺

史姜須達為會州總管甲戌遣兼散騎常侍程尚賢兼  
通直散騎常侍韋憚使于陳戊寅詔曰昔有苗不賓唐  
堯薄伐孫皓僭虐晉武行誅有陳竊據江表逆天暴物  
朕初受命陳項尚存思欲教之以道不以龔行為令往  
來脩睦望其遷善時日無幾豐惡已聞厚納叛亡侵犯  
城戍勾吳閩越肆厥殘忍于時王師大舉將一車書陳  
項反地收兵深懷震懼責躬請約俄而致殞矜其喪禍  
仍詔班師叔寶承風因求繼好載佇克念共敦行李每



見珪璫入朝輜軒出使何嘗不殷勤曉喻戒以惟新而  
狼子之心出而彌野威侮五行怠棄三正誅翦骨肉夷  
滅才良據手掌之地恣溪壑之險劫奪閭閻資產俱竭  
驅蹙內外勞役弗已徵責女子擅造宮室日增月益止  
足無期惟薄嬪嬙有踰萬數寶衣玉食窮奢極侈淫聲  
樂飲俾畫作夜斬直言之客滅無罪之家剖人之肝分  
人之血欺天造惡祭鬼求恩歌儻衢路酣醉宮閭盛粉  
黛而執干戈曳羅綺而呼警蹕躍馬振策從旦至昏無

所經營馳走不息負甲持仗隨逐徒行追而不及即加  
罪譴自古昏亂罕或能比介士武夫饑寒力役筋髓罄  
於土木性命俟於溝渠君子潛逃小人得志家家隱殺  
戮各各任聚斂天災地孽物怪人妖衣冠鉗口道路以  
目傾心翹足誓告於我日月以冀文奏相尋重以背德  
違言搖蕩疆場巴峽之下海濱已西江北江南為鬼為  
蜮死隴窮發掘之酷生居極攘斂之苦抄掠人畜斷截  
樵蘇市井不立農事廢寢歷陽廣陵窺覷相繼或謀圖

城邑或劫剝吏人晝伏夜遊鼠竄狗盜彼則羸兵敝卒  
來必就擒此則重門設險有勞藩捍天之所覆無非朕  
臣每關聽覽有懷傷惻有梁之國我南藩也其君入朝  
潛相招誘不顧朕恩士女深迫脅之悲城府致空虛之  
歎非直朕居人上懷此無忘既而百辟屢以為言兆庶  
不堪其請豈容對而不誅忍而不救近日秋始謀欲弔  
人益部樓船盡令東驚便有神龍數十騰躍江流引伐  
罪之師向金陵之路船住則龍止船行則龍去三日之

內三軍皆覩豈非蒼旻愛人幽明展事降神先路協贊  
軍威以上天之靈助戡定之力便可出師授律應機誅  
殄在斯舉也永清吳越其將士糧仗水陸資須期會進  
止一準別勅秋八月丁未河北諸州饑遣吏部尚書蘇  
威賑恤之九月丁丑宴南征諸將頒賜各有差癸巳嘉  
州言龍見冬十月己亥太白出西方己未置淮南行臺  
省於壽春以晉王廣為尚書令辛酉陳遣兼散騎常侍  
王琬兼通直散騎常侍許善心來聘拘留不遣甲子將

伐陳有事於太廟命晉王廣秦王俊清河公楊素並為  
行軍元帥以伐陳於是晉王廣出六合秦王俊出襄陽  
清河公楊素出信州荊州刺史劉仁恩出江陵宜陽公  
王世積出蘄春新義公韓擒虎出廬江襄邑公賀若弼  
出吳州落叢公燕榮出東海合總管九十兵五十一萬  
八千皆受晉王節度東接滄海西拒巴蜀旌旗舟楫橫  
亘數千里曲赦陳國有星孛于牽牛十一月丁卯車駕  
餞師詔購陳叔寶位上柱國萬戶公乙亥行幸定城陳

師誓衆景子幸河東十二月庚子至自河東

九年春正月己巳白虹夾日辛未賀若弼拔陳京口韓擒虎拔陳南豫州癸酉以尚書右僕射虞慶則為右衛大將軍景子賀若弼敗陳師於蔣山獲其將蕭摩訶韓擒虎進師入建鄴獲其將任蠻奴獲陳主叔寶陳國平合州三十郡一百縣四百癸巳遣使持節巡撫之二月乙未廢淮南行臺省景申制五百家為鄉正一人百家為里長一人丁酉以襄州總管韋世康為安州總管夏

四月己亥幸驪山親勞旋師乙巳三軍凱入獻俘於太廟拜晉王廣為太尉庚戌上御廣陽門宴將士頒賜各有差辛亥大赦天下己未以陳都官尚書孔範散騎常侍王嵯王儀御史中丞沈觀等邪佞於其主以致亡滅皆投之邊裔辛酉以信州總管楊素為荊州總管吏部侍郎宇文弼為刑部尚書宗正少卿楊異為工部尚書壬戌詔曰往以吳越之野羣黎塗炭干戈方用積習未寧今率土大同含生遂性太平之法方可流行凡我臣

僚澡身浴德開通耳目宜從茲始喪亂已來緬將十載  
君無君德臣失臣道父有不慈子有不孝兄弟之情或  
薄夫婦之義或違長幼失序尊卑錯亂朕為帝王志存  
愛養時有臻道不敢寧息內外職位遐邇黎人家家自  
修人人克念使不軌不法蕩然俱盡兵可立威不可不  
戢刑可助化不可專行禁衛九重之餘鎮守四方之外  
戎旅軍器皆宜停罷伐路既夷羣方無事武力之子俱  
可學文人間甲仗悉皆除毀有功之臣降情文藝家門



子姪各守一經令海內翕然高山仰止京邑庠序爰及  
州縣生徒受業升進於朝未有灼然明經高第此則教  
訓不篤考課未精明勒所由隆茲儒訓官府從宦丘園  
素士心迹相表寬弘為念勿為跼促乖我皇猷朕君臨  
區宇於茲九載開直言之路披不諱之心形於顏色勞  
於興寢自頃逞藝論功昌言乃衆推誠切諫其事甚疎  
公卿士庶非所望也各啓至誠匡茲不逮見善必進有  
才必舉無或噤嘿退有後言頒告天下咸悉此意閏月

甲子以安州總管韋世康為信州總管丁丑頒木魚符  
於總管刺史雌一雄一己卯以吏部尚書蘇威為尚書  
右僕射六月乙丑以荊州總管楊素為納言丁丑以吏  
部侍郎盧愷為禮部尚書時朝野物議咸願登封秋七  
月景午詔曰豈可命一將軍除一小國遐邇注意便謂  
太平以薄德而封名山用虛言而干上帝非朕攸聞而  
今以後言及封禪宜即禁絕八月壬戌以廣平王雄為  
司空冬十一月壬辰考使定州刺史豆盧通等上表請

封禪上不許庚子以右衛大將軍虞慶則為右武侯大將軍右領軍將軍李安為右領軍大將軍甲寅降囚徒十二月甲子詔曰朕祇承天命清蕩萬方百王衰敝之後兆庶澆浮之日聖人遺訓掃地俱盡制禮作樂今也其時朕情存古樂深思雅道鄭衛淫聲魚龍雜戲樂府之內盡以除之今欲更調律呂改張琴瑟且妙術精微非因教習工人代掌止傳糟粕不足達神明之德論天地之和區域之間奇才異藝天知神授何代無哉蓋晦

迹於非時侯昌言於所好宜可搜訪速以奏聞庶覩一  
藝之能共就九成之業仍詔太常牛弘通直散騎常侍  
許善心祕書丞姚察通直郎虞世基等議定作樂已已  
以黃州總管周法尚為永州總管

十年春正月乙未以皇孫昭為河南王楷為華陽王二  
月庚申幸并州夏四月辛酉至自并州五月乙未詔曰  
魏末喪亂寓縣瓜分役車歲動未遑休息兵士軍人權  
置坊府南征北伐居處無定家無完堵地罕包桑恒為

流寓之人竟無鄉里之號朕甚愍之凡是軍人可悉屬  
州縣墾田籍帳一與民同軍府統領宜依舊式罷山東  
河南及北方緣邊之地新置軍府六月辛酉制人年五  
十免役收庸癸亥以靈州總管王世積為荊州總管浙  
江刺史元胄為靈州總管秋七月癸卯以納言楊素為  
內史令庚戌上親錄囚徒辛亥高麗遼東郡公高陽卒  
壬子吐谷渾遣使來朝八月壬申遣柱國襄陽郡公韋  
洸上開府東萊郡公王景並持節巡撫嶺南百越皆服

冬十月甲子頒木魚符於京師官五品已上戊辰以永  
州總管周法尚為桂州總管十一月辛卯幸國學頒賜  
各有差景午契丹遣使朝貢辛丑有事於南郊是月婺  
州人汪文進會稽人高智慧蘇州人沈玄愔皆舉兵反  
自稱天子署置百官樂安蔡道人蔣山李稜饒州吳代  
華永嘉沈孝徹泉州王國慶餘杭楊寶英交趾李春等  
皆自稱大都督攻陷州縣詔上柱國內史令越國公楊  
素討平之

十一年春正月丁酉以平陳所得古器多為妖變悉命  
毀之辛丑高麗遣使朝貢景午皇太子妃元氏薨上舉  
哀於文思殿二月戊午吐谷渾遣使貢方物以大將軍  
蘇孝慈為工部尚書景子以臨潁令劉曠治術尤異擢  
為莒州刺史己卯突厥遣使獻七寶盃辛巳晦日有蝕  
之三月壬午遣通事舍人若干洽使于吐谷渾癸未以  
幽州總管周搖為壽州總管朔州總管吐萬緒為夏州  
總管夏四月戊午突厥雍虞閭可汗遣其特勒來朝五

月甲子高麗遣使貢方物癸卯詔百官悉詣朝堂上封事乙巳以右衛將軍元昊為左衛大將軍秋七月己丑以柱國杜彥為洪州總管八月壬申幸栗園滕王瓚薨乙亥至自栗園上柱國沛國公鄭譯卒十二月景辰鞞鞬遣使貢方物

十二年春正月壬子以蘇州刺史皇甫績為信州總管宣州刺史席代雅為廣州總管二月己巳以蜀王秀為內史令兼右領軍大將軍漢王諒為雍州牧右衛大將



軍夏四月辛卯以壽州總管周瑤為襄州總管五月辛

亥廣州總管席代雅卒秋七月乙巳尚書右僕射邳國

公蘇威禮部尚書容城縣侯盧愷並坐事除名壬戌幸

昆明池其日還宮己巳有事於太廟壬申晦日有蝕之

八月甲戌制天下死罪諸州不得便決皆令大理覆治

乙亥幸龍首池癸巳制宿衛者不得輒離所守丁酉上

柱國夏州總管楚國公豆盧勣卒戊戌上親錄囚徒九

月丁未以工部尚書楊昇為吳州總管冬十月丁丑以

遂安王集為衛王壬午有事於太廟至太祖神主前上  
流涕嗚咽悲不自勝十一月辛亥有事於南郊壬子宴  
百寮頒賜各有差己未上柱國新義郡公韓擒虎卒庚  
申以豫州刺史權武為潭州總管甲子百寮大射於武  
德殿十二月癸酉突厥遣使來朝乙酉以上柱國內史  
令楊素為尚書右僕射己酉吐谷渾韃韜並遣使貢方  
物

十三年春正月乙巳上柱國郇國公韓達業卒景午契

丹奚霽室韋並遣使貢方物壬子親祀感帝己未以信  
州總管韋世康為吏部尚書壬戌行幸岐州二月景子  
詔營仁壽宮丁亥至自岐州戊子宴考使於嘉則殿己  
卯立皇孫暕為豫章王戊子晉州刺史南陽郡公賈悉  
達隰州總管撫寧郡公韓延等以賄伏誅己丑制坐事  
去官者配流一年丁酉制私家不得隱藏緯候圖讖夏  
四月癸未制戰亡之家給復一年五月癸亥詔人間有  
撰集國史臧否人物者皆令禁絕秋七月戊申竦鞫遣

使貢方物壬子左衛大將軍雲州總管鉅鹿郡公賀婁  
子幹卒丁巳幸昆明池戊辰晦日有蝕之九月景辰降  
囚徒庚申以邵國公楊綸為滕王乙丑以柱國杜彥為  
雲州總管冬十月乙卯上柱國華陽郡公梁彥先卒

十四年夏四月乙丑詔曰在昔聖人作樂崇德移風易  
俗於斯為大自晉氏播遷兵戈不息雅樂流散年代已  
多四方未一無由辨正賴上天鑒臨明神降福拯茲塗  
炭安息蒼生天下大同歸於治理遺文舊物皆為國有

比命所司總令研究正樂雅聲詳考已訖宜即施用見  
行者停人間音樂流僻日久棄其舊體競造繁聲浮宕  
不歸遂以成俗宜加禁約務存其本五月辛酉京師地  
震關內諸州旱六月丁卯詔省府州縣皆給公廨田不  
得治生與人爭利秋七月乙未以邳國公蘇威弟納言  
八月辛未關中大旱人饑上率戶口就食於洛陽九月  
己未以齊州刺史樊子蓋為循州總管丁巳以基州刺  
史崔仲方為會州總管冬閏十月甲寅詔曰齊梁陳往

皆創業一方綿歷年代既宗祀廢絕祭奠無主興言矜  
念良以愴然呂國公蕭琮及高仁英陳叔寶等宜令以  
時脩其祭祀所須器物有司給之乙卯制外官九品已  
上父母及子年十五已上不得將之官十一月壬戌制  
州縣佐吏三年一代不得重任癸未有星孛于角亢十  
二月乙未東巡狩

十五年春正月壬戌車駕次齊州親問疾苦景寅旅王  
符山庚午上以歲旱祠太山以謝愆咎大赦天下二月

景辰收天下兵器敢有私造者坐之關中緣邊不在其  
例丁巳上柱國蔣國公梁睿卒三月己未至自東巡狩  
望祭五嶽海瀆丁亥幸仁壽宮營州總管韋藝卒夏四  
月己丑朔大赦天下甲辰以趙州刺史楊達為工部尚  
書丁未以開府儀同三司韋沖為營州總管五月癸酉  
吐谷渾遣使朝貢丁亥制京官五品已上佩銅魚符六  
月戊子詔鑿底柱庚寅相州刺史豆盧通貢綾文布命  
焚之於朝堂乙未林邑遣使來貢方物辛丑詔名山大

川未在祀典者悉祠之秋七月乙丑晉王廣獻毛龜甲  
戌遣邳國公蘇威巡省江南戊寅至自仁壽宮辛巳制  
九品已上官以理去職者聽並執笏冬十月戊子以吏  
部尚書韋世康為荊州總管十一月辛酉幸溫湯乙丑  
至自溫湯十二月戊子勅盜邊糧一升已上皆斬並籍  
沒其家己丑詔文武官以四考交代

十六年春正月丁亥以皇孫裕為平原王筠為安成王  
疑為安平王恪為襄城王該為高陽王韶為建安王暕



為潁川王夏五月丁巳以懷州刺史龐晃為夏州總管  
蔡陽縣公姚辯為靈州總管六月甲午制工商不得進  
仕并州大蝗辛丑詔九品已上妻五品已上妾夫亡不  
得改嫁秋八月景戌詔決死罪者三奏而後行刑冬十  
月己丑幸長春宮十一月壬子至自長春宮

十七年春二月癸未太平公史萬歲擊西寧羌平之庚  
寅幸仁壽宮庚子上柱國王世積討桂州賊李光仕平  
之壬寅河東王昭納妃宴羣臣頒賜各有差三月景辰

詔曰分職設官共理時務班位高下各有等差若所在  
官人不相敬憚多自寬縱事難克舉諸有殿失雖備科  
條或據律乃輕論情則重不即決罪無以懲肅其諸司  
論屬官若有愆犯聽於律外斟酌決杖辛酉上親錄囚  
徒癸亥上柱國彭國公劉昶以罪伏誅庚午遣治書侍  
御史柳或皇甫誕巡省河南河北夏四月戊寅頒新歷  
壬午詔曰周歷告終羣凶作亂疊起蕃服毒被生人朕  
受命上玄廓清區宇聖靈垂祐文武同心申明公穆鄖

襄公孝寬廣平王雄蔣國公睿楚國公勣齊國公頰趙國公素魯國公慶則新寧公長乂宜陽公世積趙國公羅雲隴西公詢廣業公景真昌公振沛國公譚項城公子相鉅鹿公子幹等登庸納揆之時草昧經綸之日丹誠大節心盡帝圖茂績殊勲力宣王府宜弘其門緒與國同休其世子世孫未經州任者宜量才升用庶享榮位世祿無窮五月宴百寮於玉女泉頒賜各有差己巳蜀王秀來朝高麗遣使貢方物甲戌以左衛將軍獨孤

羅雲為涼州總管閏月己卯羣鹿入殿門馴擾侍衛之  
內秋七月丁丑桂州人李代賢反遣右武侯大將軍虞  
慶則討平之丁亥上柱國并州總管秦王俊坐事免以  
王就第戊戌突厥遣使貢方物八月丁卯荊州總管上  
庸郡公韋世康卒九月甲申至自仁壽宮庚寅上謂侍  
臣曰禮主於敬皆當盡心忝稷非馨貴在祇肅廟庭設  
樂本以迎神齋祭之日觸目多感當此之際何可為心  
在路奏樂禮未為允羣公卿士宜更詳之冬十月丁未

頒銅獸符於驃騎車騎府戊申道王靜薨庚申詔曰五  
帝異樂三王殊禮皆隨事而有損益因情而立節文仰  
惟祭享宗廟瞻敬如在罔極之感情深茲日而禮畢升  
路鼓吹發音還入宮門金石振響斯則哀樂同日心事  
相違情所不安理實未允宜改茲往式用弘禮教自今  
已後享廟日不須備鼓吹殿庭勿設樂懸辛未京師大  
索十一月丁亥突厥遣使來朝十二月壬子上柱國右  
武侯大將軍魯國公虞慶則以罪伏誅

十八年春正月辛丑詔曰吳越之人往承敝俗所在之處私造大船因相聚結致有侵害其江南諸州人間有船長三丈已上悉括入官二月甲辰幸仁壽宮乙巳以漢王諒為行軍元帥水陸三十萬伐高麗三月乙亥以柱國杜彥為朔州總管夏四月癸卯以蔣州刺史郭衍為洪州總管五月辛亥詔畜猫鬼蠱毒厭魅野道之家投於四裔六月景寅下詔黜高麗王高元官爵秋七月壬申詔以河南八州水免其課役景子詔京官五品已

上總管刺史以志行修謹清平幹濟二科舉人九月己丑漢王諒師遇疾疫而旋死者十八九庚寅勅舍客無公驗者坐及刺史縣令辛卯至自仁壽宮冬十一月甲戌上親錄囚徒癸未有事於南郊十二月庚子上柱國夏州總管任城郡公王景以罪伏誅是月自京師至仁壽宮置行宮十有二所

十九年春正月癸酉大赦天下戊寅大射武德殿宴賜百官二月己亥晉王廣來朝辛丑以并州總管長史宇

文致為朔州總管甲寅幸仁壽宮夏四月丁酉突厥利  
可汗內附達頭可汗犯塞遣行軍總管史萬歲擊破之  
六月丁酉以豫章王暕為內史令秋八月癸卯上柱國  
尚書左僕射齊國公高潁坐事免辛亥上柱國皖城郡  
公張威卒甲寅上柱國城陽郡公李徽卒九月乙丑以  
太常卿牛弘為吏部尚書冬十月甲午以突厥利可汗  
為啓人可汗築大利城處其部落庚子以朔州總管宇  
文弼為代州總管十二月乙未突厥都藍可汗為部下



所殺丁丑星實於渤海

二十年春正月辛酉朔上在仁壽宮突厥高麗契丹並遣使貢方物癸亥以代州總管宇文弼為吳州總管二月己巳以上柱國崔弘度為原州總管丁丑無雲而雷三月辛卯熙州人李英林反遣行軍總管張衡討平之夏四月壬戌突厥犯塞以晉王廣為行軍元帥擊破之乙亥天有聲如瀉水自南而北六月丁丑秦王俊薨秋八月老人星見九月丁未至自仁壽宮癸丑吳州總管

楊昇卒冬十月己未太白晝見乙丑皇太子勇及諸子  
並廢為庶人殺柱國太平縣公史萬歲己巳殺左衛大  
將軍五原郡公元旻十一月戊子天下地震京師大風  
雪以晉王廣為皇太子十二月戊午詔東宮官屬不得  
稱臣於皇太子辛巳詔曰佛法深妙道教虛融咸降大  
慈濟度羣品凡在含識皆蒙覆護所以雕鑄靈相圖寫  
真形率土瞻仰用申誠敬其五嶽四鎮節宣雲雨江河  
淮海浸潤區域並生養萬物利益兆人故建廟立祀以

時恭敬敢有毀壞偷盜佛及天尊像嶽鎮海瀆神形者以不道論沙門壞佛像道士壞天尊者以惡逆論

仁壽元年春正月乙酉朔大赦改元以尚書右僕射楊素為尚書左僕射納言蘇威為尚書右僕射丁酉徙河南王昭為晉王突厥寇恒安遣柱國韓洪擊之官軍敗績以晉王昭為內史令辛丑詔曰君子立身雖云百行唯誠與孝最為其首故投主殉節自古稱難殞身王事禮加二等而代俗之徒不達大義至於致命戎旅不入

北域虧孝子之意傷人臣之心興言念此每深愍歎且  
入廟祭祀並不廢闕何止墳塋獨在其外自今已後戰  
亡之徒宜入墓域二月乙卯朔日有蝕之辛巳以上柱  
國獨孤楷為原州總管三月壬辰以豫章王暕為揚州  
總管夏四月以浙州刺史蘇孝慈為洪州總管五月己  
丑突厥男女九萬口來降壬辰驟雨震雷大風拔木宜  
君湫水移於始平六月癸丑洪州總管蘓孝慈卒乙卯  
遣十六使巡省風俗乙丑詔曰儒學之道訓教生人識

父子君臣之義知尊卑長幼之序升之於朝任之以職  
故能贊理時務弘益風範朕撫臨天下思弘德教延集  
學徒崇建庠序開進仕之路佇賢雋之人而國學胄子  
垂將千數州縣諸生成亦不少徒有名錄空度歲時未  
有德為代範才任國用良由設學之理多而未精今宜  
簡省明加獎勵於是國子學唯留學生七十人太學四  
門及州縣學並廢其日頒舍利於諸州秋七月戊戌改  
國子為太學九月癸未以柱國杜彥為雲州總管十一

月己丑有事於南郊壬辰以資州刺史衛玄為遂州總管

二年春二月辛亥以邢州刺史侯莫陳穎為桂州總管  
宗正楊祀為荊州總管三月己亥幸仁壽宮壬寅以齊  
州刺史張喬為潭州總管夏四月庚戌岐雍二州地震  
秋七月景戌詔内外官各舉所知戊子以原州總管獨  
孤楷為益州總管八月己巳皇后獨孤氏崩九月景戌  
至自仁壽宮壬辰河南北諸州大水遣工部尚書楊達

賑恤之乙未上柱國襄州總管金水郡公周搖卒隴西  
地震冬十月壬子曲赦益州管内癸丑以工部尚書楊  
達為納言閏月甲申詔尚書左僕射楊素與諸術者刊  
定陰陽舛謬己丑詔曰禮之為用時義大矣黃琮蒼璧  
降天地之神粢盛牲食展宗廟之敬正父子君臣之序  
明婚姻喪紀之節故道德仁義非禮不成安上治人莫  
善於禮自區宇亂離綿歷年代王道衰而變風作微言  
絕而大義乖與代推移其弊日甚至於四時郊祀之節

文五服麻葛之隆殺是非異說踳駁殊塗致使聖教凋  
訛輕重無準朕祇承天命撫臨生人當洗滌之時屬干  
戈之代克定禍亂先運武功刪正彞典日不暇給今四  
海乂安五戎勿用理宜弘風訓俗導德齊禮綴往聖之  
舊章興先王之茂則尚書左僕射越國公楊素尚書右  
僕射邳國公蘇威吏部尚書奇章公牛弘內史侍郎薛  
道衡祕書丞許善心內史舍人虞世基著作郎王劭或  
任居端揆博達古今或器推令望學綜經史委以裁緝



實允僉議可並脩定五禮壬寅葬獻皇后於太陵十二月癸巳上柱國益州總管蜀王秀廢為庶人交州人李佛子舉兵反遣行軍總管劉方討平之

三年春正月己卯原州總管比陽縣公龐晃卒戊子以大將軍蔡陽郡公姚辯為左武侯大將軍夏四月癸卯詔曰哀哀父母生我劬勞欲報之德昊天罔極但風樹不靜嚴敬莫追霜露既降感思空切六月十三日是朕生日宜令海內為武元皇帝元明皇后斷屠六月甲午

詔曰禮云至親以菽斷蓋以四時之變易萬物之更始  
故聖人象之其有三年加隆爾也但家無二尊母為厭  
降是以父存喪母還服于菽者服之正也豈容菽內而  
更小祥然三年之喪而有小祥者禮云菽祭禮也菽而  
除喪道也以是之故雖未再菽而天地一變不可不祭  
不可不除故有練焉以存喪祭之本然菽喪有練於理  
未安雖云十一月而練乃無所法象非菽非時豈可除  
祭而儒者徒擬三年之喪立練禫之節可謂苟存其變

而失其本欲漸於奪乃薄於喪致使子則冠練去經黃  
裏縗緣經則布葛在躬麤服未改豈非經衰尚存子情  
已奪親疎失倫輕重顛倒乃不順人情豈聖人之意也  
故知先聖之禮廢於人邪三年之喪尚有不行者至  
於祥練之節安能不墜者乎禮云父母之喪無貴賤一  
也而大夫士之喪父母乃貴賤異服然則禮壞樂崩由  
來漸矣所以晏平仲之斬麤縗其老謂之非禮滕文公  
之服三年其臣咸所不欲蓋由王道既衰諸侯異政將

踰越於法度惡禮制之害已乃減去篇籍自制其宜遂至骨肉之恩輕重從俗無易之道隆殺任情況孔子沒而微言隱秦滅學而經籍焚者乎有漢之興雖求儒雅人皆異說義非一貫又近代亂離唯務兵革其於典禮時所未遑夫禮不從天降不從地出乃人心而已者謂情緣於恩也故恩厚者其禮隆情輕者其禮殺聖人以是稱情立文別親疎貴賤之節自臣子道消上下失序莫大之恩逐情而薄莫重之禮與時而殺此乃服不稱

喪容不稱服非所謂聖人緣恩表情制禮之義也然喪與易也寧在於戚則禮之本也禮有其餘未若於哀則情之實也今十一月而練者非禮之本非情之實由是言之父存喪母不宜有練但依禮十三月而祥中月而禫庶以合聖人之意達孝子之心秋七月丁卯詔曰日往月來唯天所以運序山鎮川流唯地所以宣氣運序則寒暑無差宣氣則雲雨有作故能成天地之大德育萬物而為功况一人君于四海睹物欲運獨見致治不

藉羣才未之有也是以唐堯欽明命羲和以居岳虞舜  
叡德升元凱而作相伊尹鼎俎之膳為殷之阿衡呂望  
漁釣之夫為周之尚父此則鳴鶴在陰其子必和風雲  
之從龍虎賢哲之應聖明君德不回臣道以正故能通  
天地之和順陰陽之序豈不由元首而有股肱乎自王  
道衰人風薄居上莫能公道以御物為下必踵私法以  
希時上下相蒙君臣義失義失則政乖政乖則人困蓋  
同德之風難嗣離德之軌易追則任者不休休者不任

則衆口鑠金戮辱之禍不測是以行歌避代辭位灌園  
卷而可懷黜而無愠放逐江湖之上沈赴河海之流所  
以自潔而不悔者也至於閭閻秀異之士鄉曲博雅之  
儒言足以佐時行足以勵俗遺棄於草野堙滅而無聞  
豈勝道哉所以覽古而歎息者也方今區宇一家煙火  
萬里百姓乂安四夷賓服豈是人功實乃天意朕惟夙  
夜祇懼將所以上嗣明靈是以小心勵已日慎一日以  
黎元在念憂兆庶未康以庶政為懷慮一物失所雖求

傳巖莫見幽人徒想崆峒未聞至道唯恐商歌於長夜  
抱關於夷門遠跡犬羊之間屈身僮僕之伍其令州縣  
搜揚賢哲皆取明知今古通識治亂究政教之本達禮  
樂之源不限多少不得不舉限以三旬咸令進路徵召  
將送必須以禮八月壬申上柱國檢校幽州總管落叢  
郡公燕榮以罪伏誅九月壬戌置常平官甲子以營州  
總管韋冲為民部尚書十二月癸酉河南諸州水遣納  
言楊達賑恤之



四年春正月景辰大赦甲子幸仁壽宮乙丑詔賞罰支  
度事無巨細並付皇太子夏四月乙卯上不豫六月庚  
申大赦天下有星入月中數日而退長人見於鴈門秋  
七月乙未日青無光八日乃復己亥以大將軍段文振  
為雲州總管甲辰上以疾甚臥於仁壽宮與百寮辭訣  
並握手歔歔丁未崩於大寶殿時年六十四遺詔曰嗟  
乎自昔晉室播遷天下喪亂四海不一以致周齊戰爭  
相尋年將三百故割疆土者非一所稱帝王者非一人

書軌不同生人塗炭上天降鑒爰命於朕用登大位豈  
關人力故得撥亂反正偃武脩文天下大同聲教遠被  
此又是天意欲寧區夏所以昧旦臨朝不敢逸豫一日  
萬幾留心親覽晦明寒暑不憚劬勞匪曰朕躬蓋為百  
姓故也王公卿士每日闕庭刺史以下三時朝集何嘗  
不罄竭心府誠勅殷勤義乃君臣情兼父子庶藉百寮  
智力萬國歡心欲令率土之人永得安樂不謂遘疾彌  
留至於大漸此乃人生常分何足言及但四海百姓衣

食不豐教化政刑猶未盡善興言念此唯以留恨朕今  
年踰六十不復稱夭但筋力精神一時勞竭如此之事  
本非為身止欲安養百姓所以致此人生子孫誰不愛  
念既為天下事須割情勇及秀等並懷悖惡既知無臣  
子之心所以廢黜古人有言知臣莫若於君知子莫若  
於父若令勇秀得志共治國家必當戮辱徧於公卿酷  
毒流於人庶今惡子孫已為百姓黜屏好子孫足堪負  
荷大業此雖朕家事理不容隱前對文武侍衛具已論

述皇太子廣地居上嗣仁孝著聞以其行業堪成朕志  
但令內外羣官同心戮力以此共治天下朕雖瞑目何  
所復恨但國家事大不可限以常禮既葬公除行之自  
昔今宜遵用不勞改定凶禮所須纔令周事務從節儉  
不得勞人諸州總管刺史已下宜各率其職不須奔赴  
自古哲王因人作法前帝後帝沿革隨時律令格式或  
有不便於事者宜依前勅脩改務當政要嗚呼敬之哉  
無墜朕命乙卯發喪河間楊柳四株無故黃落既而花

葉復生八月丁卯梓宮至自仁壽宮景子殯于大興前  
殿冬十月己卯合葬於太陵同墳而異穴上性嚴重有  
威容外質木而內明敏有大略初得政之始羣情不附  
諸子幼弱內有六王之謀外致三方之亂握強兵居重  
鎮者皆周之舊臣上推以赤心各展其用不踰朞月克  
定二邊未及十年平一四海薄賦斂輕刑罰內脩制度  
外撫戎夷每旦聽朝日昃忘倦居處服翫務存節儉令  
行禁止上下化之開皇仁壽之間丈夫不衣綾綺而無

金玉之飾常服率多布帛裝帶不過以銅鐵骨角而已  
雖嗇於財至於賞賜有功亦無所愛恠乘輿四出路逢  
上表者則駐馬親自臨問或潛遣行人採聽風俗吏治  
得失人間疾苦無不留意嘗遇關中饑遣左右視百姓  
所食有得豆屑雜糠而奏之者上流涕以示羣臣深自  
咎責為之撤膳不御酒肉者殆將一暮及東拜太山關  
中戶口就食洛陽者道路相屬上勅斥堠不得輒有驅  
逼男女參廁於仗衛之間逢扶老携幼者輒引馬避之

慰勉而去至艱險之處見負擔者遽令左右扶助之其  
有將士戰沒必加優賞仍令使者就加勞問自強不息  
朝夕孜孜人庶殷繁帑藏充實雖未能臻於至治亦足  
稱近代之良主然天性沉猜素無學術好為小數不達  
大體故忠臣義士莫得盡心竭辭其草創元勳及有功  
諸將誅夷罪退罕有存者又不悅詩書廢除學校唯婦  
言是用廢黜諸子逮于暮年持法尤峻喜怒不常過於  
殺戮嘗令左右送西域朝貢使出玉門關其所經之

處或受牧宰小物饋遺鸚鵡麋皮馬鞭之屬上聞而大怒又詣武庫見署中無穢不治於是執武庫令及諸受遺者出開遠門外親自臨決死者數十人又往往潛令人賂遺令史府史有受者必死無所寬貸議者以此少之

史臣曰高祖龍德在田奇表見異晦明藏用故知我者希始以外戚之尊受託孤之任與能之議未為當時所許是以周室舊臣咸懷憤惋既而王謙固三蜀之阻不



踰朞月尉迴舉全齊之衆一戰而亡斯乃非止人謀抑  
亦天之所贊也乘茲機運遂遷周鼎于時蠻夷猾夏荆  
揚未一劬勞日昃經營四方樓船南邁則金陵失險驃  
騎北指則單于款塞職方所載並入疆理禹貢所圖咸  
受正朔雖晉武之克平吳會漢宣之推亡固存比義論  
功不能尚也七德既敷九歌已洽要荒咸暨尉候無警  
於是躬節儉平徭賦倉廩實法令行君子咸樂其生小  
人各安其業強無陵弱衆不暴寡人物殷阜朝野歡娛

二十年間天下無事區宇之內晏如也考之前王足以  
參蹤盛烈但素無術學不能盡下無寬仁之度有刻薄  
之資暨乎暮年此風逾扇又雅好符瑞暗於大道建彼  
維城權侔京室皆同帝制靡所適從聽哲婦之言惑邪  
臣之說溺寵廢嫡託付失所滅父子之道開昆弟之隙  
縱其尋斧翦伐本枝墳土未乾子孫繼踵屠戮松檟纔  
列天下已非隋有惜哉迹其衰怠之源稽其亂亡之兆  
起自高祖成於煬帝所由來遠矣非一朝一夕其不祀

忽諸未為不幸也

隋書卷二

隋書卷二考證

高祖紀下陳國平合州三十○

臣召南

按北史作州四

十以地理志証之北史是也志言陳氏荆揚之域州  
四十二郡一百九縣四百三十八紀言州四十郡一  
百縣四百皆畧舉大數耳

己未○一本作癸巳

臣映斗

按上書壬子下書壬戌中

間無由得癸巳從監本作己未

皖城郡公○監本皖作皖按前漢書地理志後漢書郡

國志俱作皖或作皖馬援傳攻沒皖城作皖

隋書卷二考證